

**REGIONAL NEWS****HEADLINES:**

1. Chief minister Pu Lalduhoma'n Assam Rifles ram luah chhuahsan a nih hnu-ah Assembly House mawi tak din chu sorkarin tha a tih thu a sawi.
2. Home minister Pu K. Sapdanga chuan tun dinhmunah Myanmar, Manipur leh Bangladesh atanga sahimna zawnga raltnan 41,355 Mizoram an awm mek thu a sawi.
3. Vawiin Hindu te kut Holi chu rampumah hlim taka hman a ni.
4. Russian President Vladimir Putin chuan Prime Minister Narendra Modi leh US President Donald Trump bakah khawvel ram hruaitute chu Ukraine buaina an ngaihven avangin lawmthu a hrilh.

&lt;&gt;&lt;&gt;&lt;&gt;

**AR LAND**

Chief minister Pu Lalduhoma chuan Aizawl khawpui laili a Assam Rifles ram luah chhuahsan a nih hnu-ah Assembly House mawi tak din chu sorkarin tha a tih thu a sawi.

Nizana minister pahnih Pu Vanlalhlana leh Pi Lalrinpui te department enkawlte atana sum ruahman sawihona-ah he thu hi sawiin Pu Lalduhoma chuan Assam Rifles ram luah chhuahsan tur hi tangkai taka hman tum a ni a ti a. Hemi atan hian party tin leh tlawnmgai pawlte telna committee din a ni dawn tih sawiin an chhuahsan tur ramah hian assembly building tur zahawm leh mawi tak dah a ni ve thei ang em tih chu rilru-a lo neih turin MLA-te a sawm a. Ram pum huap pawhin Mizoram hi assembly building nei chhe ber ni tawh a a rin thu a sawi a. Chuvangin hemi chungchang hi ngaihtuahna lo seng turin assembly member-te a chah a ni.

Cable car/ropeway chungchang sawiin chief minister chuan an enzui thu a sawi a. Tuna an rilru-ah chuan remtih tlan a nih chuan Assam Rifles quarter guard chung tlang hi a hmunpui berah hman ni ta se an ti ni-in a sawi a. Heta tang hian Pachhunga University College nena inpawhin MINECO lama kal leh Ebenezer damdawiin a kal bakah Chawnpui a All India Radio ram an dil pawh an phal tawh thu a sawi a. Chu ta chawlhhmun pakhat atang chuan state university dah an tumna hmun leh Aizawl West College dahna hmun tur Ch. Chhunga High School hmunah awm leh ta se la. Chuta tang chuan Mizoram University-ah chhuk ta se tih an ngaihtuah niin a sawi a. Chu mi chin chu ropeway bul tanna atan chuan ni phawt se tih an ngaihtuah niin a sawi a ni.

&lt;&gt;&lt;&gt;&lt;&gt;

## CM-SASCI

Chief minister Pu Lalduhoma chuan Delhi a sorkar laipui a dawrna-ah special assistance to states for capital investment (SASCI) hnuai-ah sum thahnem tak sanction tihfel a nih thu a sawi.

Nilaini a zan khat riaka Delhi a zu kalna-ah SASCI thenkhatna a thawh hnihna sum cheng vaibelchhe 93 leh nuai 50 pekchhuahna tur sanction a sawi chhuak tih nizan khan assembly house-ah a sawi a. SASCI then 5-na reformed 3-na atan cheng vaibelchhe 100 bakah SASCI then khatna hnathawh dan an thehluh ran avangin a hma a pek zat chiah cheng vaibelchhe 275-a sum sanction a rawn hawn bawk niin a sawi a ni.

Pu Lalduhoma chuan nimin tuka Union Home Minister Amit Shah nena an inbiakna-ah Lengpui tummun chu Airports Authority of India (AAI) kuta hlan dan dap leh ni se tih an sawi dun ni-in a sawi bawk a. Amit Shah hian AAI nena inbiakna thar thawh leh tha a tih thu a sawi niin a sawi a. Hei hi tlawmngai pawlte leh political party dangte pawhin an duhdan a nih thu hrilhin chulam hawi chu tha a tih ve thu union home minister hi a hrilh tih a sawi a. Hemi chungchangah hian amah leh Amit Shah leh Civil Aviation minister-te nen sawiho ni se ti-in thu an dah thu a sawi a. Union home minister hian theihtawp chhuahpui a inhuam ni a a hriat thu sawiin a chungah pawh lawmthu a sawi niin a sawi. A lo sawi tawh thin angin sorkar chuan Lengpui tummun hi Indian air force kuta hlan hi an tum ngawr ngawr lo niin a sawi a. AAI hnena hlan emaw duhthlan tur dang emaw dap turin an inhawng reng niin a sawi a ni.

Pu Lalduhoma hi Nilaini khan Delhi lamah a chhuk thut a. Delhi a cham chhung hian Nilaini khan union home secretary Govind Mohan, intelligence bureau director Tapan Kumar Deka leh national security adviser Ajit Kumar Doval te nen inhmu-in thil an sawiho thu a sawi a. Hei bakah hian Aizawl khawpui laili atanga Zokhawsang a Assam Rifles insawnna puala thlahna hun hmang tura lokal Assam Rifles hotupa ber Director General Lt. General Vikas Lakhera leh Assam Rifles hotu lian dangte nen hemi chungchang hi nimin khan Aizawlah an sawiho niin an sawi bawk a. Assam Rifles DG hian an insawn chhuahna turah hian harsatna siam hauh lovin theihtawpin a tanpui zawk ni a sawiin a chungah lawmthu a sawi a ni.

<><><>

## REFUGEES

Home minister Pu K. Sapdanga chuan tun dinhmunah Myanmar, Manipur leh Bangladesh atanga sahimna zawnga raltn 41,355 Mizoramah an awm mek a ni, a ti.

A department chana sum ruahman sawihona khaikhawm paha he thu hi sawiin Pu K. Sapdanga chuan Mizoramah hian tun dinhmunah Myanmar atanga raltn mi 33,505, Manipur a chi leh chi intihbuai avanga sahimna zawng mi 5,633 leh Bangladesh atanga raltn mi 2,217 an awm mek thu a sawi a. An vai hian mi 41,355 an ni a ti. He'ng raltnante enkawl tur hian high level committee on indigenous displaced people (HLCIDP) chu din a ni a, a tul dan angin an thukhawm reng a ni, a ti bawk. Mizoram leh Assam ramri buai chinfel kawnga hmalakna kal mekah April thla khian state pahnih official-te inbe tura ruahman a nih thu a sawi a. Nikum August ni 9-a state pahnih minister-te inbiakna kal zelah Assembly member-te rawtna angin zau zawka inrawn khawm chungchang pawh ngaihtuah a nih tur thu a sawi bawk.

Home minister chuan state human rights commission din tura sorkarin ruahmanna a kalpui mek thu a sawi a. Hei bakah hian state level police accountability commission leh district level police accountability commission dinna tur atan hriattirna chhuah a nih tawh thu a sawi a. National human rights commission leh nikuma dan thar duante'n an phut angin directorate of prosecution din tura hmalak mek a nih thu a sawi bawk a ni.

<><><>

#### SENIOR CLUB

Social Welfare & Tribal Affairs Minister Pi Lalrinpuii chuan kumin chhung hian District Pali- Champhai, Siaha, Lunglei leh Kolasib-ah te Sorkarin kum lama upa te enkawlna hmun 'Old Age Home' hawn a nih tur thu leh Aizawl Ainawn Veng ami pawh tihchangtlun an tum thu a sawi.

Pi Lalrinpuii hian vawiin-a Senior Club Mizoram te'n High Council 2025 Zarkawt Community Hall-a buatsaih a hmanpuina-ah hei hi sawiin, sorkarin kum upa te tana hmala in, ruahmanna pawh lo nei mahse, kum upa-te mamawh ber chu rilru hlim leh thlahmuang taka an khawsak a, duat leh hmangaih taka enkawltu tur chhungkua an mamawh ber a ni a ti a. Upate pawimawhna leh zah an ngaihzia te chu tu leh fate zirtir a ngai a, hnam lungphum innghahna chu upate an ni a, thalai te chu hnam chakna an ni a, naupang zawk te chu hnam beisei innghahna an nih avangin kum upa te chu thlauthlak thiang an nih loh mai bak-ah thlahthlam theih an ni lo a ni, a ti.

<><><>

#### CM - MONITORING

Chief minister Pu Lalduhoma chuan sorkar hnuai a hnathawh dan endiktu project monitoring committee member a tel pawl pakhat aiawte'n anmahni thu-in khawi maw lai hnate an lo endik niawm taka sawi chu pawi a tih thu a sawi.

Nizana minister pahnih department enkawlna tur sum sawihona-ah he thu hi sawiin Pu Lalduhoma chuan hetianga Mizoram state project monitoring committee a tel pawl pakhatin a hrarpa a hnathawh an lo endik ve hi monitoring committee chuan a hriatpui loh thu a sawi a. Hei hi thudik a nih a, an sawi anga pawisate an lo dil a nih leh nghal phei chuan a pawi hle dawn a ni, a ti a. Mizoram state project monitoring committee member-te'n hetiang hi an tih loh tawp tur a nih thu sawiin chief minister chuan hetiang laka an inthiarfihlim thei dawn lo a nih chuan sorkar hnathawh endiktu a tel tlak lovah inchhuah a tul mai thei a ni, a ti a. Hetianga state project committee a tel anmahni thu a hna lo endik ve ni a puhte hi tute nge an nih erawh chu a sawi chhuak lo a ni.

Mizoram sorkarin sorkar hnuai a hna thawh mekte endik tura a dinah hian member 18 awmin chief minister chu chairman a ni a. Vice chairman leh secretary chu sorkar officer chawl tawh an ni a. Member dang 6 chu sorkar hnathawk lai mek leh Mizoram university a thawk 3 leh Pachhunga university a thawk lai 1 te an ni. Kohhran inzawmkhawm pawl, tlawmngai pawl, zirlai pawl 2, political party hrang hrang, Mizoram consumer union leh MPF te atangin aiawh 12 an tel bawk a ni.

<><><>

### RIVERS

International Day of Action for Rivers vawi 28-na chu vawiin khan Irrigation & Water Resources Department bultumin IWRD Auditorium, MINECO-ah kan luite hi kan hmabak a ni tih thupui hmangin Mizoram-a tui hna humhalh a ngaihzia leh bawlhhlawh pahiim fimmkhur loh avanga a nghawng chhiat zia te zau zawka inhrilhhriatna hun hman a ni.

He hun hi IWRD Minister Pu PC Vanlalruata chuan hmanpuin Mizoram chhunga lui te, tui hna leh ram ngaw te leh leilung hausakna hrang hrang humhalhna kawngah he ni hian awmze thui tak a neih ngei a beisei thu a sawi a. A tel lo a kan awm theih loh 'tui' renchem, vawn thianglim, tui hna humhalh leh bawlhhlawh tih tlem kawngah mi tinin mawhphurna an neih thusawi-in, vawi khat hman plastic hman tlem leh bawlhhlawh, thil tangkai siamchhuah na'na sawngbawl kawngahte hmalakna kalpui a pawimawh thu a sawi. Minister chuan ram leilung hausakna humhalh tur hian nakin nghak lovin, tun atang hian mahni theihna zawn zel ah penchhuah a pawimawh a tul thu leh kan ram neihchhun hi luah tlaka kan tu leh fate tan kan siam zel theih na'n tun Mizoram a luah mektute hian mawhphurna pawimawh tak an neih thu a sawi a ni.

<><><>

### AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

### HOLI

Vawiin khan Hindu te kut Holi chu rampumah hlim taka hman a ni. Holi pualin Presidetn Droupadi Murmu, Vice President Jagdeep Dhankar leh PM Narendra Modia ten mipuite chibai an buk.

President chuan a thuchah ah Holi chu rawng hrang hrang kut anih thu leh hlim leh lawm taka hman tur a nih thu a sawi a.

Vice President Dhankar pawhin mipuite Holi duhsakna hlanin tha in sual a hnehma ni anih thu a sawi a. Bul tan tharna ni leh thlirna thar nen hun hmang turin a chah a ni.

Prime Minister Narendra Modia pawhin mipuite Holi chibai a buk a. Hlim leh lawm taka hmang tura chahin ramchhung mipuite thinlungah inpumkhatna tuh se aduh thu a sawi a ni.

<><><>

### PRESIDENT PUTIN

Russian President Vladimir Putin chuan Prime Minister Narendra Modi leh US President Donald Trump bakah khawvel ram hruaitute chu Ukraine buaina an ngaihven avangin lawmthu a hrilh. Vawiina Belarus President Alexander Lukashenko nen chanchinbumite an kawmnaah President Putin-a chuan PM Modia bakah Brazil leh South Africa President te leh khawvel hruaitu dangten remna kawng zawnga theihtawp an chhuah chu lawmawm a tih thu a sawi a ni.

Thla hmasaa PM Modia leh President Trump te an inkawm tum khan Pu Modia chuan India in remna a duh ber thu a lo hrilh tawh a ni.

US pawhin ni 30 inkahhai puang turin hma a la mek bawk a ni.

<><><>